



Republika e Kosovës
Republika Kosova - Republic of Kosovo
Qeveria - Vlada - Government



Ministria e Shëndetësisë / Ministarstvo Zdravstva / Ministry of Health
Instituti Kombëtar i Shëndetësisë Publike të Kosovës

Nacionalni Institut za Javno Zdravstvo Kosova / National Institute Public Health of Kosova

Prishtinë, 1 dhjetor 2015



Kosova numëron më së paku raste të HIV/AIDS-it në Evropë

Written by

Tuesday, 01 December 2015 19:49 - Last Updated Wednesday, 02 December 2015 00:03

Kosova klasifikohet në mesin e vendeve me shkallë të ulët të epidemisë së HIV/AIDS-it, ndërsa edukimi shëndetësor, zhvillimi i kapaciteteve diagnostikuese dhe përdorimi i terapisë antiretrovirale, kanë bërë që mundësitë për ballafaqim me këtë sëmundje të rriten ndërsa ndaj kategorisë së të prekurve të hiqen paragjykimet negative.

Kështu u tha sot në Prishtinë, në një tryezë profesionale kushtuar 1 Dhjetorit-Ditës Ndërkombëtare të HIV/AIDS-it, organizuar nga Ministria e Shëndetësisë në bashkëpunim me Institutin Kombëtar të Shëndetësisë Publike dhe Zyrën e OSh-së në Prishtinë.

Dr. Izet Sadiku, zëvendësministër i Shëndetësisë tha se kjo ditë shënon një moment të veçantë për të shprehur përkushtimin për një qasje të veçantë ndaj HIV/AIDS-it, diçka që në Kosovë nuk ka munguar dhe rezultatet janë të mira. Duke rikujtuar se ballafaqimi me këtë sëmundje në Kosovë ka filluar në vitet e nëntëdhjeta, zëvendësministri theksoi se falë bashkëpunimit të mirë midis profesionistëve shëndetësor të vendit, bashkëpunimit me partnerët ndërkombëtarë dhe shoqërisë civile, Kosova është duke zbatuar Strategjinë e tretë me radhë ndaj kësaj sëmundje, ndërsa rezultatet janë evidente dhe ato tregojnë që Kosova ka numrin më të vogël të rasteve me HIV/AIDS.

Ai tha se MSh vlerëson lart edhe bashkëpunimin me Fondin Global si përkrahës i projektit për luftimin e TB dhe HIV/AIDS-it në Kosovë, ndërkohë që siguri i terapisë antiretrovirale, ka mundësuar ballafaqimin me sukses me këtë sëmundje dhe trajtim të merituar për të prekurit nga ajo.

Dr. Naser Ramadani, drejtor ekzekutiv i IKSHP-së, tha se duke qenë që ky institut është institucioni më i lartë shëndetësor, profesional dhe shkencor i Kosovës në shëndetësinë publike, IKSHP përcjell në vazhdimësi situatën epidemiologjike me HIV/AIDS dhe merret me parandalimin e kësaj sëmundje. Ai tha se me rastin e kësaj dite, IKSHP ka zhvilluar fushata ndërgjegjësimi duke vizituar shkolla e shpërndarë materiale ndërgjegjësimi; po zhvillohen hulumtime kualitative për HIV për komunitetin Rom, Egjiptian dhe Ashkali; janë dërguar radio mesazhe për popullatën, etj, ndërkohë që IKSHP po vazhdon në rrugëtimin drejt parandalimit të sëmundjeve ngjitëse dhe jo ngjitëse, përmes intervenimit në procesin fillestar, duke identifikuar faktorët e rrezikut që ndikojnë në sëmundshmërinë e popullatës.

Dr. Skënder Syla, shef i Zyrës së OBSH-së në Kosovë, tha se bota është e përkushtuar për t'i dhënë fund epidemisë së AIDS-it deri në vitin 2013 me kusht që të përshpejtojë ritmin e progresit të arritur në nivel global përgjatë pesëmbëdhjetë viteve të fundit. "Tani më është bërë përparim i dukshëm. Synimi zhvillimor i mijëvjeçarit lidhur me frenimin dhe përmbysjen e HIV-it në nivel global është arritur. Në fund të vitit 2014 numri i vdekjeve të shkaktuara nga HIV-i është reduktuar në 42% nga 2 milionë sa ishte në 2004 në përrreth 1.2 milionë në vitin 2014", theksoi dr. Syla.

Dr. Salih Ahmeti, dekan i Fakultetit të Mjekësisë të UP-së, duke rikujtuar vitin 1986 kur ishte shfaqur rasti i parë i HIV-it në Kosovë tha se prej asaj kohe e deri më tash, kanë ndryshuar shumë konceptet e trajtimit të kësaj sëmundjeje dhe rezultatet e sotme, falë edhe ndërgjegjësimit të qytetarëve, edukimit shëndetësor, por edhe përdorimit të protokolleve të reja të trajtimit ku antiretroviralët janë të pazëvendësueshëm, rezultatet në trajtim janë shumë të mira.

Kurse, doajeni i shëndetësisë publike në Kosovë, profesori Isuf Dedushaj, tha se fakti që Kosova ka incidencën më të ultë sa i përket HIV/AIDS-it në botë, tregon se përgjatë viteve, që prej shfaqjes së rastit të parë, është bërë punë e madhe dhe është arritur që sëmundje sot të vihet nën kontroll. “Edukimi shëndetësor i popullatës, puna me grupet e rrezikuara, bashkëpunimi midis profesionistëve dhe përdorimi i antiretroviralëve,ÂÂÂÂÂ kanë mundësuar rezultate me të cilat mund të krenohemi”, tha profesor Dedushaj.

Kurse, menaxherja e programit të Fondit Global (FG) për HIV/AIDS, dr. Edona Deva, tha se falë kontributit edhe të kësaj organizate, janë arritur rezultate të mira në nivel kombëtar dhe global, dhe fakti që FG mbulon 60 për qind me antiretroviralë 40 për qindëshin e pjesës së botës që përdor këtë terapi flet mjaft. Ajo vlerësoi se është bërë mjaft edhe në eliminimin e stigmës për personat e prekur, ndërkohë që po punohet që Kosova t'i ketë më të ardhmen të gjitha mundësitë për ballafaqim të suksesshëm me HIV/AIDS-in në kohën kur granti mbështetës i Fondit Global të ketë përfunduar.

Në tryezën e sotme, dr. Luljeta Gashi nga Departamenti i Epidemiologjisë i IKSHIP-së, prezantoi situatën epidemiologjike me HIV/AIDS në Kosovë, ku u bë e ditur se prej vitit 1986 kur është regjistruar rasti i parë e deri më sot në Kosovë janë regjistruar 100 raste: 54 raste me AIDS dhe 46 me HIV infeksion, prej të cilave 41 kanë përfunduar me vdekje si pasojë e AIDS-it. Në aspektin gjinor, 69% i takojnë gjinisë mashkullore ndërsa 31 % gjinisë femërore. Gjatë vitit 2015, janë regjistruar 2 raste të reja, që krahasuar me vendet e rajonit është numër shumë i vogël.

Komunikatë për media

Written by

Tuesday, 01 December 2015 19:49 - Last Updated Wednesday, 02 December 2015 00:03

